



Aqqalu C. Jerimiassen

UKA 2025/7-3

Atassut

14. November 2025

2026-mut Aningaasanut inatsisissatut siunnersuut

(Aningasaqarnermut Akileraartarnermullu Naalakkersuisoq)

Akisussaassuseqarneq ataqqinaataavoq!

Siunissaq ungasinnerusoq eqqarsaatigalugu aqagumuinnaq eqqarsarata aaliangersaanerput naqissusiivoq, nunatta isumannaannerusumut tassa maanna aallariartuaalersinnaanissaa.

Nuna manna tummisarput avataanit tikeraat tummartillugu pilliuteqartarnissaat eqqanaarparput!

Ila angusaq nuanni!

Takornariaqarnikkut aningaasanut inatsisissaq tassaalerpoq inuiaqatigiinnut illersuisussamik ilusilik.

Takornariaqarnikkut tassaasussanngorpugut isumannaarittussanngortut tamatsinnut iluaqutaasumik ilusilerneqarnissaanut aqutissiuimasut.

Aningaasanut inatsit una malillugu tassaasussanngorpugut kommunit nutaamik aaqqissuussiffiqeqarnissaannut isumannaarinnittussanngortut akisussaassusilimmik ilusilernissaannut. Naak isumaqatigiinniarnep nalaanni ataqeqatigiittarneq avaqqutiinnarlugu akorngatsinni eqqunngilluinnartumik avammut annissuisoqarsimangaluartoq.

Illumut angusaq nuanni!

Kissaaterpassuaqartaqaagut, soorlulusooq ilaanni nunatta karsia imaarsinnaanngitsutut isigilersoorsarlutigu.

Maanna piffissaq taanna qaangiuttariaqarpoq, akisussaassuseqartumik aningaasatigut aqutsineq siunissarput isumannaattuutikkumallugu tamatta qitiutilluta ilusilerneqartariaqarpoq.

Nuannaarutissatta Atassummiit ilagilluinnagaat maanna tassaavoq, Atassummi sivilisunerpaamik inatsisartuniissimasortatta "Aataqqii" Siverth K Heilmann-ip uummateqarfigingaarlugit sulissutiguarsimasai, tassalu Tarsartuup tasiata taamatuttaarlu Tasersiap atorluarneqarnerusariaqarneranut aningaasanut inatsisikkut eqqanaarinninneq!

Qanoq inutaa tamassa malinnaaguni qujamasutsigaa, qularinngilarpummi maanna Maniitsumi illunnguaminniit malinnaasoq.



Aalisarnej ukiorpanni suli nappatigissagipput aningaasarsiornitsinnilu pingaarnarpaamik inissisimatissagipput qularnannilaq, maannali tassa suliniutit allat aningaasarsiorfissat aallarnisarneqalernerattaq oqiliallatsitsivoq neriulluarnerusitsilerlunilu siunissamut.

Nunatta karsia imaattuittuunngilaq, taannalu tamatta iluamik paarisussaavarput, inuiaqatigiittut tamatta tamavitta pigigatsigu, asulilu qujangequsaarluni tusarnersaarnikkullu imaarneqartariaqanngittoq.

Aningaasaqarnermut akileraartarnermullu ataatsimiitsitaliap sulilluarsimanera nersualaarusupparput, taamatuttaarlu naalakkersuisutta ullorpassuit qasuttuillutik aningaasanut inatsisissaq unammillernaqisoq pitsaanerpaamik inissikkumallugu ulapaarsimanerannut.

Tassalu maanna kinguneraa, inuiaqatigiinnut eqqornerluisussaanngitsumik taamatuttaarlu iluaqusiisussamik imaqalerluni.

Soraarnerussutisianut katersisussaatitaanermi naammassinninngissimanermi akileraarutikkut pillarneqartarnermut inatsisip naammassivinnissaata tungaanut unikaallatsinneqanera toqqissiallannartuuvoq, taannalu alloriarnej siullertut isigisassaavoq Atassummi ukiorpanni sorsuutigisimasatta angujartuaalernissanut kiisami.

Taamaattumik Atassummiit naammagisimaarinnigaaqaluta 2026-imut aningaasanut inatsisissatut siunnersuut tamakkiisumik taperserlutigu oqarumavugut, suleqataanitsinnilu angusarpassuarnut qujamasulluta. Tassa suleqatigiinneq, tassa suleqatigiinnerup anersaava, kalaallit katersuuffeqarnissarput pisariaqarpoq, avissaartuugatalu tamanna aamma uagut Atassummi toqqarparput.